

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. मुखमंत्री ओमर अब्दुल्ला होरें जम्मू-कश्मीर च महत्वपूर्ण पनबिजली परियोजनाएं दे कम्में दा जाया लैता ते इ'ने कम्में गी बेल्ले सिर सबूरा करने दी जरूरतें पर जोर पाया।
2. मुखमंत्री होरें श्रीनगर आहले सिविल सचिवालय च इक बैठक दी प्रधानता करदे होई जम्मू-कश्मीर च कोआपरेटिव बैंकें दे कम्मकाज दा जायजा लैता।
3. जम्मू-कश्मीर विधानसभा दे स्पीकर अब्दुल रहीम राथर होरें श्रीनगर च उच्च स्तरी एपेक्स कमेटी दी बैठका च नेशनल ई-विधान एप्लीकेशन दी अमल-आवरी दी समीक्षा कीती।
4. श्री अमरनाथ जी दी जातरा बवस्थित ढंग्गें सिर जारी ऐ। जम्मू दे भगवती नगर यात्री निवास थमां सख्त सुरक्षा बंदोबस्तें हेठ 3 जहार 500 अमरनाथ श्रद्धालुएं दा इक होर जत्था अज्ज कश्मीर घाटी लेई रवाना होआ।
5. मौसम विभाग नै अगले 48एं घैंटें दरान प्रदेश च भारी बरखा दे असार दस्से न। चानचक्क हाड़ औने, ल्हास-पस्सियां पौने ते दरेयाएं च पानी दा स्तर चानचक्क बधने दी चेतावनी बी जारी कीती गेई ऐ।

<><><><><><>

CM-Power Projects

मुख्यमंत्री ओमर अब्दुल्ला होंरें जम्मू-कश्मीर च बड़ें पनबिजली ते सौर उर्जा प्रोजेक्टें दी व्यापक समीक्षा कीती ते आखेआ जे परियोजनाएं गी बेल्ले सिर तोढ़ चाढना जकीनी बनाने दे कन्नो-कन्नी इंदी अमल-आवरी च औने आहली रुकावटें गी दूर कीता जाना बी लोड़चदा ऐ। बैठक दरान मुख्यमंत्री होंरें 1 ज्हार 856 मैगावाट दी समर्थ आहली सावलकोट पनबिजली परियोजना, 93 मैगावाट दी समर्थ आहली नमीं गांदरबल पनबिजली परियोजना, 48 मैगावाट आहली लोअर कलनाई पनबिजली परियोजना ते 5 मैगावाट दी समर्थ आहली पाम्पोर सौर उर्जा परियोजना दे कम्में च हासल प्रगति दा जायजा लैता। बैठक दरान 2025 बरें आहली पनबिजली सरबन्धी नीति दे मसौदे पर बी विचार बटांदरा कीता गेआ जेहड़ी 2011 आहली नीति दी थाह लैग ते एहदे राहें निजी ते सार्वजनिक सांझ-भ्याली आहली बवस्था तैहत रास-पूंजी दे नमें मौके पैदा होडन। मुख्य सचिव अटल डुल्लु ते होरनें सीनियर ऐहलकारें बी इस बैठका च हिस्सा लैता।

<><><><><><>

CM Coop-Banks

मुख्यमंत्री ओमर अब्दुल्ला होंरें कल श्रीनगर आहले सिविल सचिवालय च इक बैठक दी प्रधानता करदे होई जम्मू-कश्मीर च कोआपरेटिव बैंकें दे कम्मकाज दा जायजा लैता। इस मौके पर मुख्यमंत्री होंरें इनें बैंकें दी मजूदा स्थिति ते कारकरदगी दी समीक्षा कीती। जम्मू ते अनंतनाग दे जिला कोआपरेटिव बैंकें दी माली कारकरदगी च सुधार दी सराहना करदे होई मुख्यमंत्री होंरें होरनें कोआपरेटिव बैंकें गी आखेआ जे ओह् अपने नुकसान गी घट्ट करदे होई अपने आपै गी मुनाफाबखश बनान। इस मौके पर ओमर होंरें बैंकें आसेआ कीती जारदी मुख्य

पैहलकदमिं दा बी जायजा लैता। ओमर होरें जम्मू-कश्मीर च माली इदारें गी तगड़ा बनाने, माली स्थिरता हासल करने ते ग्रामीण सशक्तिकरण जकीनी बनाने लेई ठोस सुधारें दी जरूरतें पर जोर पाया।

<><><><><><>

Speaker-Neva Projects

जम्मू-कश्मीर विधानसभा दे स्पीकर अब्दुल रहीम राथर होरें कल विधानसभा परिसर श्रीनगर च उच्ची सतह दी एपैक्स कमेटी दी बैठक दी अध्यक्षता कीती जेदे च जम्मू-कश्मीर असेंबली च राष्ट्रीय ई-विधान प्रोजेक्ट गी लागू करने दे कम्मै च होई दी प्रगति दा जायजा लैता गेआ। स्पीकर अब्दुल रहीम राथर जेड़े जे इस उच्ची सतह दी कमेटी दे अध्यक्ष बी हैं, होरें मती तरजीह आहले इस प्रोजेक्ट दे बारें च तफसीली जानकारी हासल कीती। एहदा मकसद विधान पालिका दे सारे कम्मै-काजें गी पेपरलैस यानि विजन कागज दे इस्तेमाल आहला बनाना ऐ। इस मौके उनें इस महत्वपूर्ण प्रोजेक्ट दे समेंसिर मुकम्मल होने दे महत्वै पर लो पाई ते दस्सेआ जे एहदी मदद कन्नै विधानसभा दा कम्मकाज किस चाल्ली भलेआं आधुनिक ते सखल्ला बनी जाग। उनें सरबंधित सब्भनें मैहकमें गी आखेआ जे ओह आपूं चै नेइमा तालमेल बनाइयै कम्मै च तेजी आहनन तां जे इसी तौले शा तौले इस्तेमाल च आंदा जाई सकै।

<><><><><><>

LS-Modernization

केन्द्री सूचना ते प्रसारण राज्यमंत्री डॉ. एल मुरुगन होरें आखेआ ऐ जे सरकार सब्भनैं राज्यें च आकाशवाणी ते दूरदर्शन केन्द्रें दा आधुनिकीकरण ते विस्तार करारदी ऐ। लोकसभा च इक सोआलैं दे लिक्खियै दिते गेदे परते च डॉ. मुरुगन होरें आखेआ जे लोक प्रसारण गी तगड़ा बनाने लेई प्रसारण सरबन्धी ढांचे ते नेटवर्क विकास योजना दे तैहत आकाशवाणी ते दूरदर्शन केन्द्रें दा दर्जा बधाया जा'रदा ऐ। उ'नैं दस्सेआ जे 2021 थमां 2026 तोहड़ी लेई 2 जहार 5 सौ 39 करोड़ रुपें शा मते दे बजट कन्नै इस योजना गी मंजूरी दिती गई ऐ। एहदे तैहत खास तौर पर डिजिटलीकरण ते प्रसारण संयंत्रें दे आधुनिकीकरण बक्खी ध्यान दिता जाहग। उ'नैं दस्सेआ जे सरकारैं बिहार च प्रसारण बुनियादी ढांचे दे आधुनिकीकरण लेई बक्ख-बक्ख परियोजनाएं गी मंजूरी दिती ऐ।

<><><><><><>

Satish-Livestock Traders

खुराक, सिविल सप्लाई ते उपभोक्ता मामले दे मंत्री सतीश शर्मा होरें जम्मू-कश्मीर दे पशु बपारिं कन्नै पंजाब च किश मेला-ठेकेदारें आसेआ कीती गेदी बदसलूकी करी उनेंगी होई दी परेशानी दी खबर पर जबरदस्त चिंता प्रगट करदे होई मामले दा संज्ञान लैता ऐ। कुल कश्मीर थोक मटन बपारी यूनियन दे प्रतिनिधिं कन्नै गल्लबात करदे होई मंत्री होरें गी दस्सेआ जे किश प्राइवेट ठेकेदारें आसेआ जम्मू-कश्मीर दे पशु बपारिं गी रस्ते च खामकखा तंग कीता गेआ ते उन्दे पर रौब जमाइयै उन्दी गड़डिं गी बार-बार रोकेया गेआ। मंत्री होरें सरका दी बचनबद्धता गी पक्का करदे होई यकीन दोआया जे ओह एह मामला पंजाब सरकार कन्नै जरूर पुट्टडन।

<><><><><><>

Amarnath-Yatra

सख्त सुरक्षा बंदोबस्तें हेठ अज्ज अमरनाथ जात्रिएं दा 22मां जत्था जम्मू दे भगवती नगर आहले आधार शिविर जातरी निवास थमां कश्मीर घाटी लेई रवाना होआ। लौहिके-बड्डिएं कुल 140 गड्डिएं दे काफले, जेदे च इक मोटर साइकल बी शामिल ऐ, बड्डिलै 3 बज्जियै 25 मिनटें कोला लेइयै 4 बजे दरान जम्मू थमां रवाना होए। इस जत्थे च कुल 2 जहार 704 मर्द, 675 महिलां, 12 न्याणे, 81 साधु ते 28 साध्वियां शामिल न जेड़े बम-बम भोले दे जयकारे लांदे होई बालटाल ते पहलगाम लेई रवाना होए। इनें श्रद्धालुएं चा 832 बालटाल ते 2 जहार 668 पहलगाम आहले रस्तेया पवितर गुफा लेई अपनी जातरा शुरू करंगन। जातरा पर आए दे श्रद्धालु इंतजामें पर मता संदोख प्रगट करै करदे न।

<><><><><><>

Div Com Road Projects

जम्मू दे डिवीजनल कमिशनर रमेश कुमार होरें कल इक बैठक लाइयै जम्मू-अखनूर-पुंछ ते बुद्धल-माहौर-गूल सिडक पर जारी कम्में च हासल प्रगति दा जायजा लैता। इस मौके पर उनें जिमीं हासल करने सरबन्धी मामलें पर चर्चा कीती ते कम्में च आवा करदी रूकावटें गी दूर करने लेई बक्ख-बक्ख मैहकमें बश्कार तालमेल दी जरूरतें पर जोर पाया। राश्ट्री जरनैली सिडक 144-ए दे इक हिस्से दे तौर पर तोढ़ चाढी जा'रदी जम्मू-अखनूर-पुंछ सिडक परियोजना दे तैहत मजूदा सिडकें गी चैड़ा करियै 2 लेन आहली जरनैली सिडक बनाया जा'रदा ऐ। इस्सै चाल्ली

बुद्धल-माहौर-गूल सिड़क परियोजना दा मकसद, रजौरी, रामबन ते रियासी जिलें बश्कार संपर्क
गी बेहतर बनाने लेई मजूदा सिड़क दा दर्जा बधाइयै उसी द'उं लेन आहली जरनैली सिड़कें च
तब्दील करना ऐ। डिवीजनल कमिशनर होरें सरबन्धत जिला प्रशासन गी निर्देश दिते जे ओह
कम्म तोढ़ चाढ़ा करदी एजेंसी गी हर मुमकन सैहयोग उपलब्ध करोआन तांजे इ'नें परियोजनाएं
गी तेजिआ कन्नै सबूरा करोआया जाई सकै।

<><><><><><>

STD-GST

जम्मू-कश्मीर टैक्स दी चोरी करने आहलें दी नकेल कस्सने ते माल समेयान ते सेवाएं पर
लग्गने आहले टैक्स-जीएसटी गी असरदार ढंगगै नै लागू करना जकीनी बनाने लेई जम्मू-कश्मीर
टैक्स विभाग नै समूलचे जम्मू संभाग च बड़डे पैमाने पर इन्सपेक्शन यानि जांच अभियान शुरू
कीता ऐ। स्टेट टैक्स कमिशनर पी.के भट्ट हुंदे नेतृत्व ते खलाफवर्जी ते प्रशासन दियां
अतिरिक्त कमिशनर जम्मू नम्रता डोगरा हुंदी अगुवाई च बनाई गेदिएं विशेष टीमें संभाग दे
बक्ख-बक्ख हिस्सें च केई थाहरें व्यापक जांच अभियान चलाए जिस दरान एह दिक्खेआ गेआ
जे कुत्थे-कुत्थे किस चाल्ली टैक्स चोरी दी कोश्ट कीती जंदी ऐ, फर्जी बिल बनाइयै जा होर कुसै
तरीके कन्नै कियां गड़बड़ी कीती जंदी ऐ। इस पैहलू पर मता ध्यान दिता गेआ। इनें टीमें
बपारिए, बारोबारिएं दे रिकार्ड, बिल बुक्कां ते स्टॉक दी बी जांच कीती।

<><><><><><>

Weather

ते हून खबर मौसम दी। मौसम विभाग नै समूलचे केन्द्र शासित प्रदेश च हौली थमां दरम्याने दर्जे दी बरखा दे असार दस्से न। खास तौरा पर जम्मू खिते च अगले 48एं घैंटे दुरान बक्ख-बक्ख थाहें पर भारी थमां बड़ी भारी बरखा बरी सकदी ऐ। मौसम विभाग मूजब, रजौरी, पुंछ, रामबन, रियासी, उधमपुर, जम्मू ते कठुआ जिलें च अज्ज तेज बरखा दे असार न। जारी इतलाह च मौसम विभाग नै प्रदेश दे केई हिस्सें च चानचक्क हाड़ औने, ल्हास-पस्सियां पौने ते नदिएं-नालें च पानी दा स्तर चानचक्क बधने दी शेंका बी जाह कीती ऐ।

<><><><><><>